



31. oktober 2018

UKA2018/150

**Qanoq ililluta nunatta iluani timersornikkut pitsanngorsaallutalu ineriartortitseqqissinnaavugut? Nunatta nunanut allanut unammisartoqarnerup tungaatigut inerisaajumalluta, timersoqatigiiffiit nunatsinni pissartanngorniuttarnerit avataatigut, nunatta iluani unammisaqattaartarnerat akulikinnerulersinneqassappata taava qanoq iliuseqartariaqarpugut? Apeqquteqaat aallaavigalugu oqallinnissamik siunnersuut.**

(Aleqa Hammond, Nunatta Qitornai)

Peter Olsen IA-meersoq oqallisissiaqarpoq soqutiginarluinnartumik oqallisigissallugulu ullutsinnut assorsuaq inuusuttunut aammalumi uatsinnut utoqqasaalaannguanut pissanganartumik. Qujanaq Piitaaq taamatut oqallisissiaqarnernut.

Timersorneq pinngitsoorneqarsinnaanngilaq, tamanna qangarsuaaniilli inuiattut annertoorsuarmik pisariaqartittuarsimavarput.

Qanga meeranngusut nunami qajaasaartinneqartarput kingorna allingunik qaannamik immami angalalerunik nukitigut aammalu qaannami issiatillutik immap aalaneranut oqimaaqatigiissumik ingerlasinnaaneq makitasinnaanerlu sungiusartarpaat, allunaariartarput nukittuujumallutik aammalu inuit pinnguaateqarput nukiit aammalu piginnaasat inuuniarnermi pinngitsoorneqarsinnaanngitsut pigiliukkumallugit, taamaasiunngikkaannimi piniartuuniarnermi sapiuttunngorsinnaaneq aammalu sanngiittuusinnaaneq pinngitsoorneqartarpoq. Inuniarnermi timersuutit taamaattut pinngitsoorneqarsinnaanngillat.

Ullumikkut piffinni amerlasuuni tamakku sulii atuupput, aamma tulluusimaarutaapput kulturitsinnik tunngavillit inuuniarnermi sulii atormata.

Ullumikkut inuunerme nutaanerusumi timersornikkut siunertarput allaqqinnaajuvoq. Timiginne-rujumalluta, peqqinnerujumalluta, aliikkutaqarumalluta, pimoorussiumalluta, susasaqartitsiniarluta allatigullu tunngaveqartumik timersornikkut ingerlatsivugut.

Timersorneq pitsaasuvoq tamanut. Meeqqanut, utoqqarnut, utoqqasaanut, arnanut, angutinut kikkungaluartulluunniit ataatsimoorfiat katersuuffiallu. Meerartavut unammitillugit illersuilluni nuannertaqaaq, aallusnaanut tapersersuilluni nuannertaqaaq, nunatsinni illoqarfikkaartumik unammiaaaleraangamik malinnaalluni nuanneqaaq malinnaanaqaaq aammalu nunatta unammisartui sumilluunniit timersuummik unammitillugit tulluusimaarnartaqaaq inuiattullu attorneqaatigisarpaput anersaakkut anginerulersittarmatigut. Qujanartut.

# Nunatta Qitornai

## Inatsisartuni



Ukiuni kingullerni isikkamik arsartarnerup annertuumik atugassatigut pitsanngorsaaffigineqarnera torraaqaq. Meerarpassuit ivigaasanik arsaaffeqalernerani tariffissaralui pinngitsoortillugit arsar-nissamut soqutiginnilersinneqarneri qularutissaanngillat aammalu pinaveersaartitsineq torrallanne-rusinnaanngilaq amerlalluinnartut taamatut peqataammata. Isumaqarpugut ivigaasanik arsaaf-feqarnissaq sumi tamaani inoqarfinni pigineqalertariaqartoq ilami ullumikkut arsaaffeqarratereer-put amerlanerit. Ilaasa mikinerit ilaasa anginerit tamarmillu pigisinnaasai aallaavigalugit ivigaasaqalersinnerisigut pinngitsoorami sungiusarfiit pitsaanerusut pigilernerisigut siunissami ta-lentmasse-rput tassalu pikkorittorujunngortartut amerlanerisigut pigineqalissasut isumaqarpugut.

Kalallit unammisartuvut nunarsuarmioqatigiinnut unamillersinnaalluurtuupput, massa inuianngu-ulluta ikiutsuinnaat. Tamanna annertusarneqartariaqarput amerlanerusut tapersorneqarlutik aammalu naalackersuinikkut annertuumik pingaartinneqartariaqarput inuiattut misigissutsisigut ataatsimuulersitsisarput pitsaasumik aammalu timersornerup peqqinnartup aallunneqarnera inui-aqatigiinnik peqqinnerusumik peqqinnartumillu soqutigisaqartut nassatarisarmagit.

Unamillersinnaaneq peqqinnartoq inerisarneqartarpoq, anginerusumik angusaqarusussuseqarner-mik nassataqartarpoq aammalu ikinngutigiinnermik nukittuumik nassataqartarput. Sukkut tama-tigut timersorneq tapersersugassaavoq aqquataavorlu inuiannut peqqinnerusunut nukittune-rusunullu.

Qujanaq Piitaaq oqallisissiarlut.